

Kerwered `93

Die Begriesung vun eisch do unne steht mer jetzt bevor,
mach ichs wie Vorsjoher orrer wie vor zwää Johr?
Die Entscheidung fällt mer immer uffs neije schwer,
wo krien ich nore die bassende Worde her?
Gunn Dach ehr Leit, so werd mol ogefang,
un wies dann weidergeht das siehmer dann.
Gries eich Gott ob alt ob jung, ob dick ob dinn,
ob schlau odder net schlau,
jetzt sinner werrer do all medenanner,
un here glei Stories iwwer de ä un de anner.
Doch genuch der Worde ich fang jetzt oh,
sunscht hogge mer de ganse Meddach do.

Heiko, Sascha, Torsten im McDrive

Bei junge Leit, daß es gewiß
daß do kä Karre sicher is.
Die dun die Autos samme reide
das is ball nimmi zu beschreiwe.

Irschend wann, doh muschds jo bassäre,
do misse se ehr Kischde uf de Schrottplatz kutschäre.
An Idee net grad arm im Kopp,
hohle se die schenshd Roll ausm Schopp,
se spanne de greschde Bulldog dro,
denn der Hänger muß vier Golfcher drohe.

Verpfleschung gefaßt un dann gehts los,
mime riese Karacho sin se no Lautre uff de Äsell geblos!!
Als se endlich dort oh kumm sinn,
hadde se schun e halwes Käschsche Prämium drin.

Die Karre ware ruck zuck abgelad,
denn um denne Schrott, wars nimmi schad!
Der Mann met dem Bagger, Holadrio
macht aus jerem Golf ganz schnell e Cabrio.

Unn als se siehe die Autos uffm Schrottplatz leie,
duhn bei einische schun die Träne in die Aue steie.
Um dene Flissigkeitsvelushd aus se balangsere,
muschde se glei noch e paar Fläschjer leere.

Jetzt sin se uff die dumm Idee kumm, die Idiode
im McDonalds noch drei, vier Hamburger zu schrode.
Gesagt, getan, ein Mann ein Wort
enin in de Bulldog, un schun ware se dort.

"Unn wo mer jetzt schun im McDonalds sinn,
fahre mer a mim Bulldog ins McDrive enin!"
Mem Bulldog enin, es werd ziemlich knapp,
hoffentlich reiße mer de Imbiß net ab.

Vum Schlepper aus, is net leicht zu bestelle,
muscht sich halt äner uffs Trittbrett stelle,
die drei mem Bulldog, das bringe se ganz locker,
unn drin reiðts die Leit vor Lache vum Hocker.

Unn jetzt ruck zuck die BigMac bestellt,
awer e bißje Druck dehinner es Bullche hats Geld.
Äner steht drunne un winkt se dorschs Gässje,
bes vorre ans zwedde Käsje.

"Do honners Zeich, die BigMäcs, die Fritz,
awer das mit em Bulldog, das is wohl e Witz!?"
De Fahrer schward de Gang enin "Das is wohl e Ding,
es negschde mol fahre mer in de Burger King!!"

Die Musik speelt dene Highway Chaote:
"Mem Bolldog ins McDrive, daß is verbote!"

Knies Hans: Sportplatz-Alarm

In de Friedhofstroß, do wohnt e Mann,
dene mer gut ver Rasearwede gebrauchte kann.
Um e ufftrach aus se fere
sieht man ne als zum Mofa spazere.

Met so me heiße Gerät,
kummt er sicher nie zu speet...

Ä mol, morjens um halwer siwwe,
is er schon uff´m Sportplatz driwwe.
Mit´m Schlissel, wie gehetzt,
is er uff de Sportplatz gewetzt.

Voller Pep un voll Elan,
wollt er schmeiße de Rasemeher an.
Wie e wilder is er ä nuff
ruck zuck hat er die Deer schon uff.
Met (*Sirene*) es de Alarm los gang,
gans schee bleed hot geguckt der Mann.
Ganz verdattert sieht ma dene Mann vorm Sportheim stehe,
Er wollt doch nur mim Rasemäher e paar Runde drehe!

Zur gleiche Zeit, im Üwerdorf, hert mer es Delefon rabbele,
un Kniese Heidrun dut aus´m Bett raus Krabbele.
"E Inbruch am Sportheim, ach Gott ehr Leit,
do sah ich glei Bäckersch Edu bescheid!"

Morjens um halwer siwwe, wer brecht´n do in?
Ehr hon recht, daß kann nor e Reerer sinn!!

Die Sach, die hot sich dann schnell geklärt.

De Edu, es Brot in de Owe geschmeiß,
unn dabber die Autoschlüssel an sich gereiß.
Kaum es er dort, saht er sich noch,
das weiße Mofa das kensche doch!! (*Pause*)

"Oh Gott Hans, is der was bassert?
Hosche dem Inbrescher äni geschmert?"
"Edu, Himmel Sakrament, was han er do bloß ingebaut?
Jetzt hon er mer de ganze morje versaut!!

Ich wollt bloß schaffe bis zum Vergase,
unn mähe dene blede Rase!
Ämol e bißche eifrisch sinn,
unn schun tapsche in e Fall enin!

Meim Bub sei Plän die sinn mer zu bled,
es nächste mol werd selbschd gemeht!!
Himmel Herrgot noch enin,
im Sportheim es e Alarmolach drin!!"

Ehr kenne jo all dene eifriscche Mann,
wie der so gut fluche kann.
Mer det ne heit noch do owwe here,
wenn net Bäckersch Edu wäre.

Das sowas net noch e mol basseert,
kriecht er heit vun uns e Liedsche spendeert!!

Krick Otto: Farbe

Im Friejohr, korz nohm Winterschlußverkauf
kumme die Reerer aus ehre Heisjer raus.
Do kummt ähner uff die glorreich Idee,
e neiji Hausfarb wär ganz schee.

Er schrubbt no Lautre in de "Auchter",
e paar Liter Farb un e Roll, daß braucht er!!
Dort kratzt er sich unner de Kapp...
"Ich wäß!! Ich kaaf e weiße Farb!!"

Kummt dehäm o, dut noch do rum buschere
"Wie du ich jetzt am beschde die Farb ans Heisje schmeere?"
In Seele Ruh steht er vorre dro,
unn guggt sich die ganz Sach erscht emol o.

Gemietlich die Lahder enuff gestawwert,
un unerwegs noch die Farb verschlawwert.
Uff´m Gericht do steht der Opelaner,
mit´m Rellche un seiner Farb in de Ahmer.

Un wie in de Opel, das muß mer werklich soh,
so macht er sich an die Arwet gemächlich dro.
De Wind sieht denne Mann do walze,
unn denkt: "Dem du ich die Arwet schä vesalze!!"

Mimme riese Karacho kummt de Wind dann o,
unn dud em die Farb in de Ähmer fort drohe!
"Eh du Sau, loß bloß die Ähmer stehe!"
Wild fluchend sieht mer dene Mann uff´m Gericht druff stehe.

Naß geschwitzt greift er sich an sei Kapp,
während desse lad de Wind die Ämer üwwer de Autos ab.
"Oh Schreck, oh Graus,
wie siehn dann jetzt die Autos aus!!"

Mit uffgerissene Aue unn blaßem Gesicht,
denkt er noch so: "Daß bringt mich vor Gericht!"
Sei herzallerliebschdi oh getraut Fraa,
Sterzt mim Amer voll Wasser un mim Schwämmche an die
verdreckte Audos dra.

Se worschdelt, schrubbt unn macht dro erum an der Farb,
un kriecht se zum Schluß doch noch ab.

Unn ahns misse mer dem Mann noch sah
es nächste mol, wenn de Streicht, läscht de am beschde e
Fachmann dra!!

Drum speele mer jetzt dem Mann e Lied,
Bleib mit de Farb in deem Gebiet!!

Gache Hilde: Lewerknepp

Im Summer is wie jedes Johr
e Feierwehrescht geschmisse wor.
Do hot´s wie immer alles geb,
vor allem die gure Lewwerkneb.

Es war Sunndach Meddach,
die Zeit wo mer ißt,
es war kä schlecht Wetter,
es hat net gepißt.
Do kriet e Reerer Fraa hunger wie e Depp
un freit sich uff die Lewerknepp!
Se denkt, ich muß mich dort glei mo melle
un dabber noch e paar Knepp bestelle!

Grübel, grübel und studer,
was fer Nummer hot dann die Feierwehr?
Se es schunn fascht fertisch mit de Nerve,
un will es Delefonbuch in die Eck werfe!

Dann find ses noch mit ledschder Kraft
die 112, es es geschafft!!! (*Pause*)

Es ganz Johr läßt se sich net hetze,
doch jetzt dud se ans Delefon wetze.
Die 3 Taschde, daß wär doch gelacht,
daß hon ich frieher mit links gemacht.

Kaum hat die Fraa die Nummer ingeb,
meld sich do so e annerer Depp.
"Do is die Hauptwach Lauterecke,
wo is dann jemand am verrecke?"

Jetzt werd der Fraa ehr Herz ganz schwer.
"Es das die Reerer Feierwehr?"
Die Reerer, kinisch wie se sinn,
wolle mich lehe eh nur rin!
Um an dem Späßje mit se mache
bestellt die gut Fraa dann ehr Sache:
"Ich hock do im Hinnerseh,
mer dud de Mae ganz schä weh!
Ich ded for Glick im Dreieck hopse,
kräht ich jetzt e poor Lewerklopse!"
Der Mann vun de Wach kann sich nimmie halle vor lache,
un dut mit der Fraa noch sei Witzjer mache!
Die Fraa denkt: "Derfe die mich fer dumm verkaafe
ich glaab ich muß do mo ä niwwer laafe!"

De Hehrer uff die Gawel geknallt,
un die Fauscht richtung Himmel geballt.
So is die Fraa die Bud enaus,
iwwer die Gaß ins Feierwehrhaus!
Dort hot se gemach e mords Zoff
unn hot net de richtisch o gedroff.
Sie hot gerast, gedobt un geblärrt,
bis er ähner ins Wort enin schnärret.
"Was geht dann do ab?"
Ich glaab ehr hon Spatze unner de Kapp!
"Ehr wolde mer e Bär uff binne,
ich bin net bleed wie ehr do hinne!"
So hot mer die Fraa schelle geheert,
bis die Feierwehr hot die Sach uffgeklärt.

Jetzt is se worr vor Wut ganz rot:
"Ach Gott, was bin ich e Idiot!
Die 112 jetzt es es klar,
daß es die Hauptwach Lauterecke war!"

Weiß Ursel: Blumenkästen

In Roth, daß es kä Witz,
do hot die Feierwehr Insatz met de Spritz!
Ledschdens hot frieh morjens die Siren los geplärrt,
die Leid senn vor schreck aus´m Bett uff geschnerrt.

Sie stertze zum Bett enaus,
um se gugge, ob brennt ehr Haus.
Es qualmt un rußt mit Newwelschwade,
do forre brennt de Metzjerlade!

Newedro saust de Hartmut los wie e Blitz,
er will sin de erschde Mann an de Spritz!
Es Feierwehraudo an sich gereß,
un unne die Schläusch uff die Stroß geschmeß.

Gefahr erkannt,
sofort gebannt!
Mer lowe noch schnell die Feierwehr,
ehr sinn unser beschdes Brandlöschherr!

De ganze Laade war ausgebrennt,
mer hot ne bal nimmie gekennt.
Die Inhaber hon e Inrichdungsfirma her bestellt,
unn losse sich was biede fer ehr Geld.
E Theek, e Kiehltruh, alles muschd her,
vor allem e schäni neii Deer!!!

Audomadisch muß se senn,
daß die Leid kenne kumme äfach erinn.
So e Deer, so schä aus Glas,
bringt de Besitzer e haufe Spaß!!!

E Fraa, do hinne aus de Reih,
war mol bei so me Spaß debei.

"E Frach loßt mer äfach kä Ruh,
wie lang brauch so e Deer, bis se geht zu?"
So hot se als do rum studeert:
"Beim negschde mol werds Usbroweert!"

Zu derer Tat ganz fescht entschloß,
es se Richtung Metzjer los.

Se es enein, es Esse kaafe,
un dud rickwärts aus´m Lade laafe.
Se laafd un laafd un guggt no de Deer,
wo kommt dann jetzt de Blumekaschde her?

Die Fraa, sie es ganz beherzt,
do hinne üwwer de Dibbe gesterzt!
Ehr Korb will fliehe, sie loßt ne net los,
unn baufdich leie se alle zwee uff de Stroß.

Die Blume aus dem Blumedibbe,
kann mer schmeiße uff de Komboscht do driwwe.

Weil der Fraa is sonschd nix bassert,
kriecht se von uns e Lied spendeert.

So jetzt muß ich das Ding noch daafe,
dann losse mer es Bier so rischdisch laafe.
Derf ich vorstelle Bruno, so häßt unser Strauß,
Denne losse mer jetzt hänge e Johr do drauß.
Die Musik es unser greschder Schatz,
drumm klatschen all no diesem Satz.
Drumm bedanke mer uns all,
met eme riesegroße Beifall!!!
E schrei fer die Musik!

Das Johr hommer vun de Wert nimmand gefroht,
mer honns ne letschd Johr schun ogedroht.
Weil se uns Vorsjohr net genumm,
es uns die sach kumm viel zu dumm.
Bei Schmidte do üwwe misse mer uns a bedanke,
weil mer durfte met ´m Strauß unnerm Schopp erum wanke.
Weil mer grad am bedanke sinn,
danke mer de Feierwehr, weil mer durfte in ehr Haus enein.
Ich mach jetzt schluß ehr Leid
drum kenne ner kaafe e Kerwered heid.
Die drei Erste, daß es doch War,
danze mer das Johr a!